

## DOMINGU III TEMPU KOMÚN – TINAN C

### Tema

Liturjia domingu ne'e nian tau Maromak nia Liafuan iha sentru ita-nia reflesaun nian: nia mak, loos duni, sentru ba ita-nia esperiénsia sarani. Liafuan ne'e la'ós doutrina abstrata ida, ba ema intelektuál de'it; maibé, uluknanai, anúnsiu libertadór ne'ebé Maromak dirije ba ema hotu no sai isin iha Jezús no iha sarani sira.

*Leitura dahuluk* fó ezemplu oinsá Liafuan tenke hela iha sentru vida komunitária nian, Liafuan ne'ebé haklaken sai bee-matan ba ksolok no festa.

*Evanjellu* aprezena Kristu nu'udar Liafuan ne'ebé sai ema ida hodi horik hamutuk ho ema sira, atu lori libertasaun no esperansa ba vítima sira opresaun nian, terus nian, moris mukit nian. Jezús nia comunidade mak comunidade ne'ebé haklaken ba mundu Liafuan libertadora ne'e.

*Leitura daruak* aprezena comunidade ne'ebé moris husi Liafuan, habosu an ho Maromak nia Liafuan ne'ebé liberta: nia mak família ida maun-alin sira nian, iha-ne'ebé ema fahe ba malu Maromak nia don sira hodi tau ba di'ak komún, iha komuñau no solidariedade loos.

### LEITURA I – Ne 8,2-4a.5-6.8-10

Livru Neemias nian (ho ida Esdras nian, uluk ida de'it) pertense ba períodu tuir ba judeu sira nia filafali husi ezíliu Babilónia nian.

Ita iha sékulu V/IV mK; ba makhorik sira Jerusalém nian, ne'e mak tempu ida moris iha mizéria no dezolasaun, ho sidade laho muru no portau sira, sidade ida ne'ebé uluk furak. Neemias, funsionáriu boot liurai Artaxerxes nian, triste tanba notísia sira nia simu husi Jerusalém, husu autorizasaun husi liurai atu ba hela iha Jerusalém. Neemias hahú ninia atividade ho rekonstrusaun muru nian (kf. Ne 3-4) no hodi kombate injustisa sira husi ema riku hasoru ema kiak sira (kf. Ne 5). Hafoin, nia buka restaura kultu (kf. Ne 8-9).

Testu ohin nian hatuur iha kontestu preokupasaun ba restaurasaun kultu: Neemias halibur Povu tomak “iha prasa ne'ebé hela iha Odamatan Bee nian”, atu rona leitura Lei nian. Ida-ne'e atu halo Povu hanoin fali kompromisu fundamentál nia asume ho Maromak: nune'e de'it mak bele prepara ba futuru foun ne'ebé Neemias mehi ba Jerusalém no ba Maromak nia Povu.

### MENSAJEN

Kestaun fundamentál ne'ebé testu sujere mak importánsia Liafuan Maromak nian iha comunidade nia moris.

Uluknanai, autór subliña konvokasaun comunidade tomak nian atu rona Liafuan: mane sira, feto sira no labarik sira ho idade “ho kbiit atu komprende”. Maromak nia Liafuan dirije ba ema hotu laho esesaun, interpela no kuestiona ema hotu.

Iha fatin daruak, nia fó atensaun ba preparativu sira: sira halo fatin ida aas ho ai-kabelak atu halo leitór hamriik iha nia leten; hafoin, loke Livru Lei nian ho forma solene no ema hotu hamriik, ho atitude respeitu no venerasaun nian ba Liafuan... Ne'e ezemplu comunidade ida nian iha ne'ebé Maromak nia Liafuan mak sentru no buat hotu halo atu Liafuan okupa fatin espesiál iha comunidade nia moris.

Iha fatin datoluk ita iha deskrisaun kona-ba ritu: asembleia hahí Liafuan; hafoin levita sira lee ho modu klaru no forte: ikusnian, sira esprika Liafuan ba Povu, atu ema hotu bele komprende leitura. Iha ne'e ita iha manuál ida kona-ba oinsá tenke halo "selebrasaun Liafuan" nian. Iha fatin dahaat, ita iha Povu nia resposta: konfronta ho Liafuan, sira tanis. Povu nia atitude hatudu, komunidadade ida ne'ebé husik atu Liafuan ne'ebé haklaken interpela sira-nia moris, konfronta an ho Liafuan no urjénsia ba konversaun. Maromak nia Liafuan efikás duni no provoka transformasaun iha vida.

Ikusnian, buat hotu remata ho festa boot ida: lora "konsagra ba Na'i" mak lora ksolok no festa nian ba komunidadade ne'ebé habosu an ho Liafuan.

## **LEITURA II – 1 Cor 12,12-30**

Leitura daruak mak kontinuasaun leitura ida domingu kotuk nian. Paulo preokupa liu tanba iha Kreda Korintu nian, karizma sira (Maromak nia don ba benefísiu tomak komunidadade nian) uza fali ba an rasik nia di'ak, kria individualizmu, divizaun, luta ba podér, desprezu ba sira ne'ebé tuir sira laiha don espesiál sira. Paulo buka atu sobu situasaun ne'ebé sai perigu ba unidade no komuñau Kreda nian.

### *MENSAJEN*

Atu ema bele komprende liután nia mensajen, Paulo utiliza komparaun ida koñese di'ak iha mundu greku-romanu: aikanoik kona-ba isin no membru sira.

Paulo kompara komunidadade sarani ba isin ida. Isin ne'e forma husi membru lahanesan barak, ida-idak ho nia knaar, katak ho ninia "karizma" pekuliár. Rikusoin ho variedade mak halo isin tomak moris. Aleinde ne'e membru sira presiza malu no preokupa ba malu. Unidade fundamentál tenke kaer liman ho pluralizmu karzmátiku no ho preokupasaun ba di'ak komún. Buat ne'ebé interesante mak identifikasaun ho Kristu nia isin: komunidadade sarani mak Kristu nia isin (vers.27). Isin ne'e tenke hatudu Krsitu totál. Paolu husu, bele fahe Kristu? Bele identifika Kristu nia isin ho konfliktu no rivalidade sira? Oinsá mak Kristu nia isin bele fó fali sasin ida egoísmu nian, individualizmu nian, orgullu nian, autosufisiénsia nian, desprezu ba kiak sira no fraku liu?

Kristu nia isin (Kreda) mak komunidadade ida maun-alin sira-nian, ne'ebé simu no partilla moris ne'ebé Kristu haraik; maski sira mak pluralidade ida membru sira-nian, ho funksion lahanesan, sira respeita malu, apoia malu, solidáriu ba malu no hadomi malu. Liafuan xave atu define rede relasaun ne'ebé liga Kristu nia isin mak "solidariedade", "partisipasaun", "ko-responsabilidade".

Iha parte ikus testu nian, Paulo prezenta ierarkia "karizma" sira-nian. Karizma iha fatin dahuluk mak liga ho Liafuan, haklaken Liafun Di'ak ("apóstolu", "profeta", "doutór" sira). Atu dehan katak Kristu nia isin mak komunidadade ida moris husi Liafuan no habosu an ho Liafuan: buat seluk ba fatin daruak, maibé buat hotu ba di'ak komún.

## **EVANJELLU – Lc 1,1-4;4,14-21**

Evanjellu ohin nian konsiste husi testu rua ne'ebé lahanesan.

Iha testu dahuluk (1,1-4), ita iha prólogu literáriu iha-ne'ebé Lucas, hodi tuir estilu eskritór sira tempu ne'ebá nian (elenizmu), prezenta ninia serbisu: ne'e mak investigasaun ida nia halo ho kuidadu kona-ba faktu sira ne'ebé akontese, atu fiar-na'in sira língua grega nian (ne'ebé Evanjellu Lucas nian diri je bá) verifika doutrina ne'e nia lialoos. Ita iha dékada 80,

nune'e sasin sira ne'ebé haree Kristu ho matan rasik la iha ona, kristianizmu hahú hasoru erezia no dezviu oiain doutrina nian, ne'ebé estraga identidade sarani. Nune'e presiza fó hanoin ba fiar-na'in sira kona-ba sira-nia abut no doutrina ne'e ninia lialoos simu husi Jezús, liuhusi sasin lejtímu katak tradisaun ne'ebé apostólu sira tatoli ka haklaken.

Iha parte daruak (4,14-21), Lucas apresenta inísiu Jezús nia pregasaun iha Nazaré, iha sinagoga. Selebrasunu kultu iha sinagoga konsiste iha orasaun no lee husi Lei no Profeta sira, ho ninia komentáriu. Leitór sira mak membru matenek comunidade nian ka, iha Jezús nia kazu, vizitante sira ne'ebé hatene esplika Maromak nia Liafuan. Sentru relatu nian mak proklamasauun testu ida Tritó-Isaiás nian (kf. Is 61,1-2) ne'ebé haktuir katak Mesias sei halo sai konkretu ninia misaun.

### *MENSAJEN*

Lucas nia obra iha finalidade atu fó hanoin ba comunidade sarani língua grega nian kona-ba sira-nia abut no sira-nia referénsia ba Jezús. Iha testu ne'e, Lucas apresenta programa ne'ebé Jezús propoin atu hala'o iha ema sira nia leet, nu'udar proposta ida libertasaun nian, dirije ba sira ne'ebé iha opresaun laran.

Pontudepartida mak leitura testu Is 61,1-2. Testu ne'e apresenta profeta anónimu ne'ebé sei konsola sira ne'ebé fila husi deportasaun no hela iha Jerusalém, nu'udar Mesias ne'ebé soi Maromak nia Espíritu; ninia misaun mak haklalak "liafoun di'ak" katak libertasaun to'o ona ba dadur sira, ba sira-ne'e terus, sira ne'ebé moris iha opresaun, injustisa, dezánimu, ta'uk. Buat ne'ebé signifikativu liu maka "atualizasaun" ne'ebé Jezús halo kona-ba profesia ne'e: Nia apresenta An nu'udar "profeta" ne'ebé Maromak marka ho Ninia Espíritu atu konkretiza misaun libertadora ida-ne'e.

Maromak nia projetu libertadór ba ema sira ne'ebé sai dadur egoíizmu, injustisa no salan nian, hahú kumpre liuhusi Jezús nia hahalok sira (vers. 21). Tuirmai, Lucas haktuir Jezús nia atividade iha Galileia nu'udar anúnsiu (iha liafuan no jestu sira) kona-ba liafoun di'ak ida dirije liuliu ba kiak no marjinalizadu sira (leprozu sira, moras sira, fetó sira) hodi dehan katak tempu moris-atan nian remata ona no hahú ona tempu foun moris no liberdade nian ba ema hotu.

Iha testu programátiku ne'e, Lucas haklaken mós, Kreda nia dalan iha futuru no kondisaun sira ninia fidelidade ba Kristu. Komunitade sarani foti konxiénsia, liuhusi testu ida-ne'e katak, ninia misaun mak ida hanesan ho Kristu nian no konsiste iha lori "liafoun di'ak" libertasaun nian ba sira ne'ebé kiak liu, fraku liu no marjinalizadu liu iha mundu ne'e. Kreda ho marka Espíritu nian, kumpre nia misaun hanesan Kristu kumpre.